



UKA16/97

6. oktober 2016

Kelly Berthelsen

**Siunissamut isigaluni pisariaqartitat aallaavigalugit ulluunerani paaqqinnittarfinni atorfinitsitsinernut, ilinniartitaanernut, pikkorissaaqqinnernut ilinniarsimasunillu sulisunik attatiinnarsinnaanermik qulakkeerinninnissaq siunertaralugu UPA 2017-imi periusissanut iliuuserisaassanullu pilersaarummik saqqummiussinissamik Naalackersuisut peqquneqarnissaannik Inatsisartut aalajangiiffigisassaannik siunnersuut.
(Peter Olsen, Inatsisartuni ilaasortaq, Inuit Ataqatigiit)**

Naalackersuisut peqquneqarnissaannik siunnersuut pineqartoq imaattumik Inuit Ataqatigiinniit oqaaseqarfigissavarput.

Suut inuiaqatigiittut pingaaruteqarluinnartut pillugit periaasissioartarpugut nukiit eqikkarlugit siunertamut erseqqissumut atorluarsinnaajumallugit. Periusissiatiguttaaq nuna tamakkerlugu assigiissumik periaaseqarnissarput qulakkeerneqartarpoq. Sorpassuit assigiinngitsut pillugit periusissioartarpoq ukiuni qassiini malinneqartussanik.

Siunnersuuteqartup oqarneratut pisuussutitta annersaat tassaapput meeqqat. Periusissioartassagutta pisuussutitta annersaannik paarsinermi sulisussaartuarnissamut periusissioarnissaq suliassani sallersaasariaqarpoq.

Ullumikkut meeqqat atuarfianni angusat kissaatigisaraluatsinnut sanilliullugu amigarnerat assorsuaq eqqasuutigalugu eqqartortarparput. Qularutissaanngitsumillu meeqqat atuarfiat sioqqullugu meeqqat piareersarluarsimanissaat angusat pitsanngoriartornissaannut aqutissaavoq. Meeqqallu paarilluarneqassagunik piareersassagunillu pikkorissunik aalajaatsunillu sulisoqartariaqarput.

Sulisut pikkorissut aalajaatsullu pissarsiarissagutsit qanoq iliussaagut? Ilinniartitaanerat pitsanngorsarniarneqassappat amerlanerusullu ilinniagaqartalissappata qanoq iliussaagut? Akissarsiaat suliassat naapertuunnerulersinniarlugit qanoq iliortoqassava? Inuiattut naleqartitat suut tunngavigalugit meeqqerivinni perorsaasoqassava, oqaatsit suut atorneqassappat? Nunaqarfinni ikittuinnarnik meerartaqarfiusuni paaqqinnittarfeqanngitsuni qanoq meeqqat atualernissamut piareersarneqassappat? Ila apeqqutit ullumi akissutissaqartinneqanngitsut amerlaqaat. Apeqqutillu akissutissarsineqanngitsut amerlavallaarnerat ilaatigut pissutigalugu meeqqat atualinnginnerminni paarineqarneranni ajornartorsiuteqartarpugut.

Taamaammatt matumuuna Inuit Ataqatigiinniit ilungersorluta Naalackersuisut kajumissaaruvagut kaammattuut tigulluarlugu kikkut attuumassuteqarsinnaasut tamaasa peqatigalugit periusissiaq piaartumik suliarileqqullugu taamalu meerartatta siunissamut pitsaasumut aallariarnissaannut qularnaarinissamut toqqammavileeqqullugit. Uagut taamaaliornissamut piareersimavugut.